

REGIONAL NEWS

UNIT

ALL INDIA RADIO, AGARTALA

Date: 03-06-2024

Time: 07.35-07.40 AM Hrs

BENGALI MORNING BULLETIN

.....

Counting:

চলতি লোকসভা নির্বাচনের ভোট গননা আগামীকাল সকাল ৮টা থেকে শুরু হবে। একই সঙ্গে অন্ধ্রপ্রদেশ ও উড়িষ্যা বিধানসভা সহ কয়েকটি উপনির্বাচনের ভোট গণনাও হবে। মুখ্য নির্বাচন কমিশনার রাজীব কুমার গতকাল সব রাজ্যের মুখ্য নির্বাচনী আধিকারিক এবং রিটার্নিং অফিসারদের সঙ্গে বৈঠক করে ভোট গননার প্রস্তুতির পর্যালোচনা করেন। নির্বাচন কমিশন জানিয়েছে কমিশনের ওয়েবসাইট results.eci.gov.in-এ গননার প্রবনতা ও ফলাফল পাওয়া যাবে।

Election result:

আগামীকাল লোকসভা নির্বাচনের ভোট গননার ফলাফল সংক্রান্ত বিশেষ নির্বাচনী সংবাদ আকাশবাণী আগরতলা কেন্দ্র থেকে প্রচারিত হবে। ঐদিন সকাল ৯টা থেকে রাত ৯টা ৫ মিনিট পর্যন্ত প্রতি ঘন্টায় বাংলা ও ককবরকে এই বিশেষ বুলেটিন প্রচারিত হবে।

এছাড়াও নির্বাচনী ফলাফলের উপর বিশেষ আলোচনা শোনা যাবে দুপুর ১২ টা ৫ মিনিটে এবং রাত ৮টা ১৫ মিনিটে।

Assembly:

অরুনাচল প্রদেশ বিধানসভা নির্বাচনে বিজেপি পুনরায় বিজয়ী হয়েছে। সিকিমে জয় পেল ক্ষমতাসীন সিকিম ক্রান্তিকারী মোর্চা। এই দুই রাজ্যের

বিধানসভা নির্বাচনের ভোট গণনা গতকাল অনুষ্ঠিত হয়। গত ১৯ এপ্রিল লোকসভা নির্বাচনের প্রথম পর্যায়ে অরুনাচল প্রদেশের ৬০টি আসনে এবং সিকিমের ৩২টি বিধানসভা আসনে ভোট হয়েছিল। উল্লেখ্য, অরুনাচল প্রদেশে বিজেপি আগেই ১০টি আসনে বিনা প্রতিদ্বন্দিতায় জয়লাভ করেছিল। বাকি ৫০টি আসনের মধ্যে বিজেপি পেয়েছে ৩৬টি আসন।

অন্যদিকে, সিকিমে ৩২টি আসনের মধ্যে ৩১টি আসন পেয়েছে সিকিম ক্রান্তিকারী মোর্চা।

SP, Press :

লোকসভা নির্বাচনের গণনাকে কেন্দ্র করে, সিপাহীজলা জেলার কোথাও কোন অশান্তির ঘটনা ঘটবে না। পুলিশ প্রশাসনের পক্ষ থেকে এই বিষয়টি নিশ্চিত করা হয়েছে। গতকাল সন্ধ্যায় এক সাংবাদিক সম্মেলনে একথা বলেছেন সিপাহীজলা জেলার পুলিশ সুপার বি. জে. রেড্ডি। তিনি বলেছেন, সোনামুড়া, বিশালগড় ও জম্পুইজলা, এই ৩টি স্থানে ভোটগণনা করা হবে। এই গণনা নির্বিঘ্নে সম্পন্ন করার জন্য, রাজনৈতিক দলের কর্মীরা গণনা কেন্দ্রের বাইরের কোন স্থানে থাকবেন, সে বিষয়ে সর্বদলীয় বৈঠকে সিদ্ধান্ত নেওয়া হয়েছে। তাছাড়া, গণনার দিন ত্রি-স্তরীয় নিরাপত্তা ব্যবস্থাও থাকবে। গোটা জেলায় নিরাপত্তার জন্য, ২ কোম্পানি CRPF, ৭ কোম্পানি TSR ও রাজ্য পুলিশ নিয়োজিত রয়েছেন বলে পুলিশ সুপার জানিয়েছেন।

NF Railway Traffic:

ঘূর্ণিঝড় রেমালের প্রভাবে প্রবল বৃষ্টির জন্য কয়েকদিন বন্ধ থাকার পর, গত শনিবার থেকে আগরতলা-লামডিং ট্রেন চলাচল শুরু হয়েছে। এন এফ রেলওয়ের লামডিং ডিভিশনের ডিআরএম প্রেমরঞ্জন কুমার, আকাশবাণীর প্রতিনিধিকে গতকাল জানিয়েছেন, আগরতলা-শিলচর থেকে দূর পাল্লার ট্রেন চলাচল শুরু হয়েছে। গুয়াহাটি থেকে ত্রিপুরা ও কাছাড়-এ, চিনি সহ

খাদ্য-দ্রব্য বোঝাই রেল রেক, পেট্রো পন্যের রেল রেক পাঠানো হয়েছে।
তিনি জানান, এই রুটে স্বাভাবিকভাবেই ট্রেন চলাচল করছে ।

CM at GB hospital:

মুখ্যমন্ত্রী অধ্যাপক ডাঃ মানিক সাহা, দুষ্কৃতিদের হাতে আক্রান্ত আগরতলা সরকারি মেডিক্যাল কলেজের তৃতীয় বর্ষের স্নাতকোত্তর ছাত্র নিখিল হাল্লাল্লিকে দেখতে জিবি হাসপাতালে যান। গতকাল রাতে আক্রান্ত ছাত্রকে দেখার পর মুখ্যমন্ত্রী জানিয়েছেন, এই আক্রমণের ঘটনা অত্যন্ত নিন্দনীয়। এবিষয়ে দ্রুত প্রয়োজনীয় পদক্ষেপ নিতে প্রশাসনকে নির্দেশ দেওয়া হয়েছে। তিনি জানান, পুলিশ ইতিমধ্যেই এই ঘটনায় জড়িত এক দুষ্কৃতিকে গ্রেপ্তার করেছে। পুলিশ জানিয়েছে, গতকাল ডাক্তারি পড়ুয়া শ্রী হাল্লাল্লি জিবি হাসপাতাল চত্বরে স্কুটি পার্কিং নিয়ে, তিন যুবকের হাতে আক্রান্ত হন । আহত ছাত্রকে জিবি হাসপাতালের ট্রমা সেন্টারে ভর্তি করা হয়েছে।

CM/Food Minister-Chitto maharaj:

মুখ্যমন্ত্রী অধ্যাপক ডাঃ মানিক সাহা গতকাল জিবি হাসপাতালে চিকিৎসারত পদ্মশ্রী প্রাপ্ত শান্তিকালি আশ্রমের চিত্ত মহারাজের সাথে দেখা করেন এবং তাঁর শারীরিক পরিস্থিতি সম্পর্কে অবহিত হন। তাছাড়া, পর্যটন মন্ত্রী সুশান্ত চৌধুরী ও বিধায়ক অভিষেক দেবরায়ও গতকাল হাসপাতালে গিয়ে তাঁর শারীরিক অবস্থার খোঁজখবর নেন। উল্লেখ্য, চিত্ত মহারাজ অসুস্থতা বোধ করলে গত শুক্রবার তাঁকে জিবি হাসপাতালে ভর্তি করা হয়।

Drama Workshop:

বিদ্যালয়ের গ্রীষ্মের ছুটির সময়ে ১৫ দিনের নাট্য কর্মশালা করল কুষ্কারঘাট তরুণ সংঘ ও মুহুরী নাট্য সংস্থা। জোলাইবাড়ি ব্লকের পশ্চিম চরকবাই গ্রাম

পঞ্চায়েতের উঁচুইবাড়ী উচ্চ বিদ্যালয়ে অনুষ্ঠিত এই কর্মশালায় ৪০ জন ছেলেমেয়ে অংশগ্রহণ করে।

Public Prosecutor Indranil:

প্রয়াত হলেন ধলাই জেলা ও দায়রা আদালতের পাবলিক প্রসিকিউটার ইন্দ্রনীল চক্রবর্তী। গতকাল আগরতলায় একটি বেসরকারি হাসপাতালে ৫৪ বছর বয়সে তিনি মারা যান। তার মৃত্যুতে শোক জানিয়েছেন ত্রিপুরা হাইকোর্ট বার কাউন্সিলের চেয়ারম্যান রতন দত্ত। তিনি জানান, প্রয়াত আইনজীবী ইন্দ্রনীল চক্রবর্তী কিডনিজনিত সমস্যায় ভুগছিলেন।

World Junior Chess:

গুজরাটে অনুষ্ঠিত অনূর্ধ্ব-১৯ বছরের বিশ্ব জুনিয়র দাবা প্রতিযোগিতার প্রথম রাউন্ডের খেলায় জয় পেয়েছে রাজ্যের আন্তর্জাতিক দাবাড়ু অর্শিয়া দাস। গতকাল অনুষ্ঠিত খেলায় প্রকাশ বৈশানীকে হারায় অর্শিয়া। ফলে এক পয়েন্ট পায়।

Women T-20 Cricket:

রাজ্য ক্রিকেট সংস্থা আয়োজিত সদরের আন্তঃ স্কুল মেয়েদের টি-২০ ক্রিকেট প্রতিযোগিতা গতকাল থেকে শুরু হয়েছে। পুলিশ ট্রেনিং একাডেমি মাঠে গতকাল সকালের খেলায় নন্দননগর স্কুল ৬ উইকেটে বড়দোয়ালি স্কুলকে, পরে একই মাঠে দুপুরের খেলায় আসাম রাইফেলস পাবলিক স্কুল ২৮ রানে প্রণবানন্দ বিদ্যাভবনকে পরাজিত করে। এছাড়া নরসিংগড়ের পঞ্চায়েত মাঠে অপর খেলায় ভবনস ত্রিপুরা বিদ্যামন্দির ১১৬ রানে প্রাচ্য ভারতী স্কুলকে হারিয়ে দেয়।

Weather:

আগরতলা ও তার পার্শ্ববর্তী অঞ্চলে আবহাওয়া দপ্তর সূত্রে জানা গেছে আজ আকাশ সাধারণত মেঘাচ্ছন্ন থাকবে। কোনো কোনো স্থানে বজ্রবিদ্যুৎ সহ দুই এক পশলা বৃষ্টিপাতের সম্ভাবনা রয়েছে। দিনের সর্বোচ্চ তাপমাত্রা থাকবে ৩৫ ডিগ্রির কাছাকাছি। আগরতলা বিমানবন্দরে আজ ভোরে সর্বনিম্ন তাপমাত্রা ছিল ২৮.২ ডিগ্রি।
